

I. DISPOSICIÓN XERAIS

BANCO DE ESPAÑA

5203 *Circular 5/2016, do 27 de maio, do Banco de España, sobre o método de cálculo para que as achegas das entidades adheridas ao Fondo de Garantía de Depósitos de Entidades de Crédito sexan proporcionais ao seu perfil de risco.*

I

O Fondo de Garantía de Depósitos de Entidades de Crédito (FGD) cumpre, no noso sistema financeiro, a función principal de protexer os depositantes fronte ás consecuencias da insolvencia dunha entidade de crédito e reforzar, ao mesmo tempo, a estabilidade do sistema bancario.

O cumprimento desa función comporta a necesidade de que o FGD dispoña de recursos financeiros suficientes. Para tal efecto, a Directiva 2014/49/UE do Parlamento Europeo e do Consello, do 16 de abril de 2014, relativa aos sistemas de garantía de depósitos (SGD), establece que as achegas aos SGD deben ser realizadas polos seus membros ao menos unha vez ao ano e deberanse basear no importe dos depósitos con cobertura e no grao de risco afrontado polos respectivos membros do SGD. En particular, de acordo co número 2 do artigo 13 da Directiva 2014/49/UE, os SGD poderán utilizar os seus propios métodos para determinar e calcular as achegas baseadas no risco. O cálculo das achegas terá en conta adecuadamente o perfil de risco das entidades adheridas, tomando en consideración indicadores como a adecuación do capital, a calidade dos activos e a liquidez.

En cumprimento do mandato encomendado polo artigo 13, número 3, da Directiva 2014/49/UE, a Autoridade Bancaria Europea (ABE) publicou as directrices sobre os métodos para o cálculo das achegas aos SGD (EBA/GL/2015/10). Estas directrices inclúen a fórmula de cálculo, categorías e indicadores de risco obrigatorios e opcionais, as ponderacións de risco asignadas aos indicadores e outros elementos necesarios. Especifican, ademais, os obxectivos e principios que deben guiar o deseño dos réximes de achegas aos SGD.

En España, a transposición da Directiva 2014/49/UE levouse a cabo, en parte, mediante a modificación que a Lei 11/2015, do 18 de xuño, de recuperación e resolución de entidades de crédito e empresas de servizos de investimento, introduciu no Real decreto lei 16/2011, do 14 de outubro, polo que se crea o FGD. O artigo 6, número 1, deste real decreto lei establece que, para o cumprimento das súas funcións, o compartimento de depósitos do FGD se nutrirá, entre outras fontes, das achegas e das derramas realizadas polas entidades adheridas. Engade, no número 3 do artigo 6, que a Comisión Xestora do FGD determinará o importe das achegas anuais das entidades ao compartimento de garantía de depósitos. Este mesmo número encomenda ao Banco de España o desenvolvemento dos métodos necesarios para que as achegas sexan proporcionais ao perfil de risco das entidades.

II

Esta circular regula o método que se debe utilizar para que as achegas das entidades adheridas ao FGD sexan proporcionais ao seu perfil de risco. Con tal fin, a circular baséase, en esencia, nos criterios contidos nas directrices da ABE antes indicadas, e opta polo método das categorías descrito nas citadas directrices.

O método parte da identificación dos indicadores de risco que se deben ter en conta, clasificados en cinco categorías: capital, liquidez e financiamento, calidade dos activos, modelo de negocio e modelo de xestión, e perdas potenciais para o FGD. A cada indicador

outorgáselle unha puntuación en función do nivel de risco. Do resultado da ponderación e da agregación dos indicadores de risco obtense un indicador de risco agregado para cada entidade adherida, que expresa, en esencia, o seu perfil de risco. A seguir obtense a denominada «ponderación de risco agregada», mediante un cambio de escala do indicador de risco agregado, que se incorpora á fórmula de cálculo prevista para determinar a achega que debe realizar cada entidade.

A circular establece tamén unhas regras mediante as cales as achegas das entidades adheridas ao FGD deben ser obxecto de axuste para ter en conta a fase do ciclo económico e o impacto das achegas procíclicas, de conformidade co disposto no artigo 6, número 3, do Real decreto lei 16/2011.

En consecuencia, en uso das facultades que ten conferidas, o Consello de Goberno do Banco de España, por proposta da Comisión Executiva e de acordo co Consello de Estado, aprobou a presente circular, que contén as seguintes normas:

ÍNDICE

- Norma 1. Obxecto e ámbito de aplicación.
- Norma 2. Categorias e indicadores de risco.
- Norma 3. Ponderación dos indicadores de risco.
- Norma 4. Regras para a aplicación do método establecido no anexo 1.
- Norma 5. Axuste das achegas anuais en función da fase do ciclo económico e do impacto das achegas procíclicas.
- Norma 6. Información que se debe remitir ao FGD.
- Disposición derradeira. Entrada en vigor e aplicación.
- Anexo 1. Método de cálculo para que as achegas das entidades adheridas ao FGD sexan proporcionais ao seu perfil de risco.
- Anexo 2. Información que se debe remitir ao FGD.

Referencias normativas utilizadas nesta circular

Regulamento (UE) n.º 575/2013

Regulamento (UE) n.º 575/2013 do Parlamento Europeo e do Consello, do 26 de xuño de 2013, sobre os requisitos prudenciais das entidades de crédito e as empresas de investimento, e polo que se modifica o Regulamento (UE) n.º 648/2012.

Regulamento (UE) n.º 1024/2013

Regulamento (UE) n.º 1024/2013 do Consello, do 15 de outubro de 2013, que encomenda ao Banco Central Europeo tarefas específicas respecto de políticas relacionadas coa supervisión prudencial das entidades de crédito.

Regulamento delegado (UE) n.º 2015/61

Regulamento delegado (UE) n.º 2015/61 da Comisión, do 10 de outubro de 2014, polo que se completa o Regulamento (UE) n.º 575/2013 do Parlamento Europeo e do Consello no que concirne ao requisito de cobertura de liquidez aplicable ás entidades de crédito.

Regulamento de execución (UE) n.º 680/2014

Regulamento de execución (UE) n.º 680/2014 da Comisión, do 16 de abril de 2014, polo que se establecen normas técnicas de execución en relación coa comunicación de información con fins de supervisión por parte das entidades, de conformidade co Regulamento (UE) n.º 575/2013 do Parlamento Europeo e do Consello.

Lei 11/2015

Lei 11/2015, do 18 de xuño, de recuperación e resolución de entidades de crédito e empresas de servizos de investimento.

Real decreto lei 16/2011

Real decreto lei 16/2011, do 14 de outubro, polo que se crea o Fondo de Garantía de Depósitos de Entidades de Crédito.

Real decreto 2606/1996

Real decreto 2606/1996, do 20 de decembro, sobre fondos de garantía de depósitos de entidades de crédito.

Circular 4/2004

Circular do Banco de España 4/2004, do 22 de decembro, a entidades de crédito, sobre normas de información financeira pública e reservada, e modelos de estados financeiros.

Norma 1. *Obxecto e ámbito de aplicación.*

1 Esta circular aplicarase ao cálculo das achegas ao compartimento de garantía de depósitos do FGD que deben efectuar as entidades adheridas, de conformidade co disposto nas letras a) e b) do número 1 do artigo 6 do Real decreto lei 16/2011.

2. Unha vez determinada a súa contía tendo en conta os depósitos garantidos, a achega de cada entidade adherida ao FGD axustarase mediante unha ponderación de risco agregada atribuída a cada entidade, co fin de que a achega sexa proporcional ao seu perfil de risco.

3. A ponderación de risco agregada obterase mediante a aplicación do método establecido no anexo 1 desta circular, sobre a base da información a que se refire o anexo 2.

4. A ponderación de risco agregada que resulte para cada entidade adherida incorporarase á fórmula incluída no anexo 1, para determinar a achega da dita entidade.

Norma 2. *Categorías e indicadores de risco.*

O método establecido no anexo 1 utilizarase tendo en conta as regras establecidas na norma 4 e basearase nas seguintes categorías e indicadores de risco:

1. Categoría de capital: ten por obxecto reflectir o nivel da capacidade de absorción de perdas de cada entidade adherida.

1.1 Ratio de aparcamento: é a ratio a que se refire o artigo 429 do Regulamento (UE) n.º 575/2013.

1.2 Ratio de capital de nivel 1 ordinario: é a ratio a que se refire o artigo 92, número 2, letra a), do Regulamento (UE) n.º 575/2013.

2. Categoría de liquidez e financiamento: mide a capacidade da entidade para cumprir, no momento do seu respectivo vencemento, as súas obrigacións a curto e a longo prazo, sen afectar negativamente a súa situación financeira.

2.1 Ratio de cobertura de liquidez: é a ratio a que se refire o artigo 4 do Regulamento delegado (UE) n.º 2015/61.

2.2 Ratio de financiamento estable neta: é a ratio con que se valora o cumprimento da obrigación de manter unha variedade de instrumentos de financiamento estables, de conformidade co previsto no artigo 413 do Regulamento (UE) n.º 575/2013.

3. Categoría de calidade dos activos: ten por función mostrar a medida en que é probable que a entidade incorra en perdas por risco de crédito.

3.1 Ratio de instrumentos de débeda con incumprimentos: é o cociente entre, por unha parte, o importe bruto en libros (sen deducir provisións) dos instrumentos de débeda con incumprimentos distintos dos activos financeiros mantidos para negociar e dos activos financeiros designados a valor razoable con cambios en resultados e, por outra parte, o importe bruto en libros dos instrumentos de débeda distintos dos activos financeiros mantidos para negociar e dos activos financeiros designados a valor razoable con cambios en resultados, de conformidade cos criterios establecidos na Circular 4/2004.

3.2 Ratio de cobertura de instrumentos de débeda con incumprimentos: é o cociente entre, por unha parte, o importe da deterioración de valor acumulado dos instrumentos de débeda con incumprimentos distintos dos activos financeiros mantidos para negociar e dos activos financeiros designados a valor razoable con cambios en resultados e, por outra parte, o importe bruto en libros dos instrumentos de débeda con incumprimentos distintos dos activos financeiros mantidos para negociar e dos activos financeiros designados a valor razoable con cambios en resultados, de conformidade cos criterios establecidos na Circular 4/2004.

4. Categoría de modelo de negocio e modelo de xestión: reflicte a calidade do goberno corporativo e os controis internos da entidade, tendo en conta o risco relacionado co modelo de negocio actual e os plans estratéxicos da entidade.

4.1 Ratio de activos ponderados por risco entre o activo total: é o cociente entre, por unha parte, o importe total da exposición en risco a que se refire o artigo 92, número 3, do Regulamento (UE) n.º 575/2013 e, por outra parte, o activo total do balance reservado a que se refire a Circular 4/2004.

4.2 Ratio de rendibilidade do activo: é o cociente entre, por unha parte, o resultado do exercicio obtido pola entidade e, por outra parte, o activo total do balance reservado a que se refire a Circular 4/2004.

5. Categoría de perdas potenciais para o FGD: reflicte o risco de perdas para o FGD en caso de inviabilidade dunha entidade adherida.

5.1 Ratio de activos sen cargas: é o cociente entre, por unha parte, os activos sen cargas, segundo se recollen no anexo XVII do Regulamento de execución (UE) n.º 680/2014 e, por outra parte, os depósitos garantidos a que se refiren o artigo 6, número 3, do Real decreto lei 16/2011 e o número 1 do artigo 4 do Real decreto 2606/1996.

5.2 Ratio de fondos propios e pasivos admisibles: é o cociente entre, por unha parte, o importe dos fondos propios a que se refire o número 118 do artigo 4.1 do Regulamento (UE) n.º 575/2013 e os pasivos admisibles a que se refire o artigo 41 da Lei 11/2015, menos o volume mínimo de fondos propios e pasivos admisibles exixido á entidade de conformidade co artigo 44 da Lei 11/2015 e, por outra parte, o activo total do balance reservado a que se refire a Circular 4/2004.

Norma 3. *Ponderación dos indicadores de risco.*

Os indicadores de risco recibirán as ponderacións seguintes:

- a) Ratio de apancamento: 12 %.
- b) Ratio de capital de nivel 1 ordinario: 12 %.
- c) Ratio de cobertura de liquidez: 11 %.
- d) Ratio de financiamento estable neta: 11 %.
- e) Ratio de instrumentos de débeda con incumprimentos: 13 %.
- f) Ratio de cobertura de instrumentos de débeda con incumprimentos: 5 %.
- g) Ratio de activos ponderados por risco entre o activo total: 8 %.
- h) Ratio de rendibilidade do activo: 8 %.

- i) Ratio de activos sen cargas: 13 %.
- j) Ratio de fondos propios e pasivos admisibles: 7 %.

Norma 4. Regras para a aplicación do método establecido no anexo 1.

1. Os valores dos indicadores de risco referidos no anexo 1 calcularanse en base individual para cada entidade adherida.

2. Como excepción ao disposto no número anterior, cando se concedese unha exención a unha entidade adherida de conformidade cos artigos 8 e 21 do Regulamento (UE) n.º 575/2013, asignaráselles aos indicadores de risco indicados nas letras c) e d) da norma 3 o valor que se calculase para o subgrupo único de liquidez de que formen parte.

3. Como excepción ao disposto no número 1, cando se eximise unha entidade adherida da aplicación dos requisitos prudenciais en base individual, de conformidade co artigo 7 do Regulamento (UE) n.º 575/2013, ou da aplicación do requirimento mínimo de fondos propios e pasivos admisibles, de conformidade co número 6 do artigo 44 da Lei 11/2015, asignaráselles aos indicadores de risco sinalados nas letras a), b), g) e j) da norma 3 o correspondente valor do indicador que teña o grupo consolidable de que formen parte.

4. Cando non estea dispoñible un indicador en base individual pola eventual existencia doutras exencións distintas ás referidas nos números anteriores, utilizarase como aproximación o valor do indicador a nivel consolidado.

5. Cando a información sobre un indicador non se encontre dispoñible por razóns legais ou polo réxime de supervisión aplicable, o dito indicador non se utilizará. A ponderación que se atribúe ao dito indicador sumarase á ponderación do outro indicador correspondente á mesma categoría de risco.

6. Cando nunha categoría non se encontre dispoñible o valor de ningún indicador por razóns legais ou polo réxime de supervisión aplicable, utilizarase unha aproximación razoable do valor dun dos indicadores desa categoría. Ao dito indicador asignaráselle unha ponderación igual á suma das ponderacións que se atribúen aos dous indicadores desa categoría. Cando a indispoñibilidade dos dous indicadores afecte o conxunto de entidades adheridas, o indicador utilizado como aproximación razoable decidirse por acordo do Banco de España.

7. No caso de sucursais de entidades de crédito con sede nun Estado non membro da UE, cando por razóns legais ou polo réxime de supervisión aplicable só se encontren dispoñibles catro indicadores ou menos, non se aplicará a metodoloxía de cálculo prevista no anexo 1. Neste caso, as achegas das sucursais calcularanse como o produto da taxa de achega do conxunto de entidades adheridas (TC) e o importe dos depósitos garantidos, segundo as definicións incluídas na fase 6 do anexo 1. Estas sucursais non se considerarán, para ningún efecto, nos cálculos do anexo 1.

8. Nos cálculos previstos no anexo 1 tomarase o valor medio dos indicadores nas dúas datas de referencia que se mencionan na norma 6. En caso de que só estivese dispoñible o valor do indicador nunha das datas, utilizarase este valor.

9. Cando por aplicación das regras de cálculo previstas no anexo 1 resulte o mesmo valor dun indicador para varias entidades, en caso de que estas non poidan ser clasificadas nun mesmo intervalo de risco, asignaranse ao intervalo de maior risco as entidades con maior importe de depósitos garantidos.

Norma 5. Axuste das achegas anuais en función da fase do ciclo económico e do impacto das achegas procíclicas.

De conformidade coa letra d) do artigo 6.3 do Real decreto lei 16/2011, o FGD poderá axustar, á alza ou á baixa, o obxectivo de achega, conforme os seguintes factores:

- a) A porcentaxe de colchón anticíclico aplicable e
- b) O eventual impacto das achegas procíclicas na liquidez e na solvencia das entidades.

O factor sinalado na letra a) considerarase para estes efectos coas seguintes limitacións:

Porcentaxe de colchón aplicable	Axuste á alza máximo por este factor	Axuste á baixa máximo por este factor
0 %.	–	20 %
Maior que 0 % e menor ou igual que 1 %.	10 %	–
Maior que 1 % e menor ou igual que 2 %.	15 %	–
Maior que 2 %.	20 %	–

Norma 6. *Información que se debe remitir ao FGD.*

O Banco de España, cando resulte competente de conformidade co Regulamento (UE) n.º 1024/2013, remitirá ao FGD a información a que se refire o anexo 2 non máis tarde do 31 de maio de cada ano. Esta información proporcionarase nas datas de referencia do 31 de decembro do ano inmediatamente anterior e do 31 de decembro do ano precedente.

Disposición derradeira. *Entrada en vigor e aplicación.*

A presente circular entrará en vigor o día seguinte ao da súa publicación no «Boletín Oficial del Estado».

O método desenvolvido nesta circular utilizarase por primeira vez no cálculo das achegas das entidades adheridas correspondentes ao exercicio económico de 2016.

Madrid, 27 de maio de 2016.–O gobernador do Banco de España, Luis María Linde de Castro.

ANEXO 1

Método de cálculo para que as achegas das entidades adheridas ao FGD sexan proporcionais ao seu perfil de risco

Para aplicar o método no cálculo dunha achega determinada aplicaranse as seis fases seguintes:

Fase 1. Clasificación das entidades adheridas en intervalos de risco

1. En relación con cada indicador de risco, as entidades distribuiranse nos distintos intervalos de risco establecidos para cada indicador, de acordo co número 4 seguinte.

2. Asignarase o mesmo número de entidades adheridas a cada intervalo. As entidades cos valores máis baixos do indicador de risco asignaranse ao primeiro intervalo de risco. Se o resultado de dividir o número de entidades polo número de intervalos de risco resultante non é un valor exacto, calcularase o resto («r») da dita división. A cada un dos primeiros «r» intervalos de risco, comezando polas entidades cos valores máis baixos do indicador, asignaráselles unha entidade adicional.

3. En relación con cada indicador de risco definido na norma 2, asignarase a todas as entidades incluídas nun mesmo intervalo de risco o valor da orde do dito intervalo. Este valor, que é un número enteiro, denominarase (i) representa, polo tanto, o valor do indicador «i» na entidade «n»).

4. Cada indicador de risco terá o seguinte número de intervalos:

- Ratio de apancamento: 12 intervalos.
- Ratio de capital de nivel 1 ordinario: 12 intervalos.
- Ratio de cobertura de liquidez: 10 intervalos.
- Ratio de financiamento estable neta: 10 intervalos.
- Ratio de instrumentos de débeda con incumprimentos: 12 intervalos.

- f) Ratio de cobertura de instrumentos de débeda con incumprimentos: 12 intervalos.
- g) Ratio de activos ponderados por risco entre o activo total: 8 intervalos.
- h) Ratio de rendibilidade do activo: 14 intervalos.
- i) Ratio de activos sen cargas: 13 intervalos.
- j) Ratio de fondos propios e pasivos admisibles: 12 intervalos.

Fase 2. Redimensionamento dos indicadores

1. Cada un dos indicadores $I_{i,n}$ resultantes da fase 1 redimensionarase conforme unha escala de 1 a 100, aplicando a seguinte fórmula:

$$IR_{i,n} = (100 - 1) \times \frac{I_{i,n} - 1}{\max_n I_{i,n} - 1} + 1$$

Onde:

« $\max_n I_{i,n}$ » é o valor máximo do indicador $I_{i,n}$ do conxunto de entidades adheridas.

« $IR_{i,n}$ » é o valor que alcanza o indicador $I_{i,n}$ redimensionado da entidade «n».

Fase 3. Asignación de signo positivo ou negativo

1. A cada indicador $I_{i,n}$ asignaráselle o signo indicado no cadro seguinte, en función do indicador de risco «i» a que se refira. Este signo é representativo do sentido da relación entre o valor do indicador e o risco da entidade.

Categoría	Indicador de risco	Signo
Capital	Ratio de apancamento	-
Capital	Ratio de capital de nivel 1 ordinario	-
Liquidez e financiamento	Ratio de cobertura de liquidez	-
Liquidez e financiamento	Ratio de financiamento estable neta	-
Calidade do activo	Ratio de instrumentos de débeda con incumprimentos	+
Calidade do activo	Ratio de cobertura de instrumentos de débeda con incumprimentos	-
Modelo de negocio e modelo de xestión	Ratio de activos ponderados por risco entre o activo total	+
Modelo de negocio e modelo de xestión	Ratio de rendibilidade do activo	-
Perdas potenciais para o FGD	Ratio de activos sen cargas	-
Perdas potenciais para o FGD	Ratio de fondos propios e pasivos admisibles	-

2. De acordo co anterior, aplicarase a seguinte transformación a cada indicador de risco resultante da fase 2:

$$IRT_{i,n} = \begin{cases} IR_{i,n} & \text{se o signo é " + " } \\ 101 - IR_{i,n} & \text{se o signo é " - " } \end{cases}$$

Onde:

$IRT_{i,n}$ é o valor que alcanza o valor do indicador «i» redimensionado e transformado da entidade «n».

Fase 4. Cálculo do indicador de risco agregado

Calcularase o indicador de risco agregado de cada entidade «n» (IRA_n) mediante a media aritmética ponderada dos $IRT_{i,n}$ obtidos na fase 3. Os $IRT_{i,n}$ ponderaranse utilizando as porcentaxes definidas na norma 3.

Fase 5. Cálculo da ponderación de risco agregada

Determinarase a ponderación de risco agregada da entidade «n» (PRA_n) a partir do indicador de risco agregado calculado na fase 4, aplicando a seguinte táboa de categorías de risco:

Indicador de risco agregado (IRA_n)	Ponderación de risco agregada (%) (PRA_n)
Maior ou igual que 1 e menor que 13.....	75
Maior ou igual que 13 e menor que 27.....	88
Maior ou igual que 27 e menor que 41.....	100
Maior ou igual que 41 e menor que 55.....	114
Maior ou igual que 55 e menor que 69.....	127
Maior ou igual que 69 e menor que 83.....	140
Maior ou igual que 83 e menor ou igual que 100.....	150

Fase 6. Determinación das achegas das entidades adheridas ao FGD

Co fin de determinar a achega de cada entidade «n» de conformidade co artigo 6 do Real decreto lei 16/2011, a ponderación de risco agregada (PRA_n) obtida integrarase na seguinte fórmula de cálculo:

$$C_n = TC \times PRA_n \times DG_n \times \mu$$

Onde:

« C_n » representa a achega ao FGD da entidade «n».

« TC » representa a taxa de achega do conxunto de entidades adheridas, definida como o cociente entre a suma das achegas das entidades adheridas, que será determinada polo FGD, e a suma de depósitos garantidos das entidades.

« PRA_n » representa a ponderación de risco agregada da entidade «n» (véxase a fase 5).

« DG_n » representa o importe de depósitos garantidos da entidade «n», a que se refiren o número 3 do artigo 6 do Real decreto lei 16/2011 e o número 1 do artigo 4 do Real decreto 2606/1996.

« μ » representa o coeficiente de axuste das achegas, que se define mediante a seguinte expresión:

$$\frac{1}{\sum_n DG_n \times \sum_n (DG_n \times PRA_n)}$$

ANEXO 2

Información que se debe remitir ao FGD

A información que o Banco de España remitirá ao FGD, de acordo coa norma 6, será a referida aos seguintes conceptos, segundo as definicións contidas na norma 2:

1. Activo total do balance reservado.
2. Activos sen cargas.
3. Depósitos garantidos.
4. Fondos propios.
5. Importe bruto en libros dos instrumentos de débeda distintos dos activos mantidos para negociar e dos instrumentos designados a valor razoable con cambios en resultados.

6. Importe bruto en libros dos instrumentos de débeda con incumprimentos distintos dos activos mantidos para negociar e dos instrumentos designados a valor razoable con cambios en resultados.

7. Importe da deterioración de valor acumulado dos instrumentos de débeda con incumprimentos distintos dos activos mantidos para negociar e dos instrumentos designados a valor razoable con cambios en resultados.

8. Importe total da exposición ao risco.

9. Pasivos admisibles.

10. Ratio de apancamento.

11. Ratio de capital de nivel 1 ordinario.

12. Ratio de cobertura de liquidez.

13. Ratio de financiamento estable neta.

14. Resultado do exercicio.

15. Volume de fondos propios e pasivos admisibles exixidos á entidade.

A información anterior referirase aos estados individuais das entidades adheridas, coas seguintes particularidades:

a) A información sinalada nos números 4, 8, 9, 10, 11 e 15 referirase aos estados consolidados cando sexa de aplicación o previsto nos números 3 ou 4 da norma 4.

b) A información sinalada no número 1 facilitarase sempre referida aos estados individuais e, adicionalmente, aos estados consolidados cando sexa de aplicación o previsto nos números 3 ou 4 da norma 4.

c) A información sinalada nos números 12 e 13 referirase ao subgrupo de liquidez cando sexa de aplicación o número 2 da norma 4.